

Sumáriu Kazu
Tribunál Judisiál Primeira Instáncia Dili
Novembru 2023

Afirmasaun: Sumáriu Kazu tuirmai ne'e deskreve faktu sira no prosesu iha tribunál tuir JSMP nia monitorizasaun independente, no deklarasaun ne'ebé parte sira fó iha tribunál nia laran. Informasaun ne'e la representa JSMP nia hanoin hanesan instituisaun ida. JSMP kondena maka'as forma violénsia hotu-hotu, liuliu hasoru fetu no ema vulneravel. JSMP afirma la iha justifikasaun ba kualkér violénsia hasoru fetu.

A. Sumáriu prosesu julgamentu kazu iha Tribunál Distritál Dili

1. Totál kazu ne'ebé JSMP monitoriza : 11

Artigu	Tipu Kazu	Númeru
Artigu 145 Kódigu Penál (KP), konjuga ho artigu 2, 3, 35 (b) no 36 Lei Kontra Violénsia Doméstika (LKVD)	Ofensa ba integridade física simples ho natureza violénsia doméstika no tipu ilísitu sira kona-ba violénsia doméstika	3
Artigu 157 KP	Ameasa	1
Artigu 20 (1), artigu 2 (2 alinea f) Lei Arma Brankas	Arma brankas	2
Artigu 151 KP	Ofensa korporal resíproka	1
Artigu 145 KP konjuga ho artigu 2, 3 (a), 35 LKVD no artigu 20 (1), artigu 2 (2 alinea f) Lei Arma Brankas	Ofensa ba integridade física simples ho natureza violénsia doméstika no arma brankas	2
Artigu 145 no artigu 20 (1), artigu 2 (2 alinea f) Lei Arma Brankas	Ofensa ba integridade física simples no arma brankas	2
Totál		11

Rua Beco Lakateu, Aldeia Manu fuik,
Suku Colmera, Administrativu Vera Cruz
Dili Timor Leste
PoBox: 275
Telefone: 3323883 | 77040735

www.jsmp.tl

info@jsmp.tl

Facebook: www.facebook.com/timorleste.jsmp

Twitter: @JSMPtl

2. Totál desizaun ne'ebé JSMP monitoriza: 8

Tipu pena	Artigu	Númeru
Suspensaun ba prizaun nia ezekusaun	Artigu 68 KP	4
Omologa pedidu dezisténsia keixa	Artigu 262 KPP	2
Admoestasaun	Artigu 82 KP	2
Totál		8

3. Totál kazu sira ne'ebé adia tuir JSMP nia monitorizasaun:0

4. Totál kazu sira ne'ebé sei kontinua prosesu tuir JSMP nia monitorizasaun : 3

1. Krime ofensa ba integridade fízika simples ho natureza violénsia doméstika no armas brankas

Nú. Prosesu : 0058/20.LILIQ

Kompozisaun Tribunál : Koletivu

Juis : Dr. José Gonçalves, Dr. Alvaro Freitas no Dra. Jumiaty Freitas

Prokuradór : Dr. Luis Hernani Rangel da Cruz

Defeza : Dr. José da Silva

Desizaun : Pena prizaun tinan 3 suspende ba tinan 3

Iha 07 Novembru 2023, Tribunál Judisiál Primeira Instáncia Díli prezide leitura akordaun ba krime ofensa ba integridade fízika simples ho natureza violénsia doméstika no arma brankas ne'ebé envolve arguidu JSC hasoru nia feen, iha Munisípiu Likisá.

Akuzasaun Prokuradór

Prokuradór akuza katak iha 26 Juñu 2020, iha oras tuku 15:00 lokraik, arguidu buti dala ida iha lezada nia kakorok, hafoin dudu lezada monu tun ba bee laran, kauza moras no halo mós lezada bokon hotu. La to'o iha ne'e deit arguidu kontinua tuku dala ida iha lezada nia hirus matan parte oin kauza moras no halo mós lezada dada i'is la diak. Depoide agresaun ne'e lezada ho nia alin ba foti lezada nia oan iha arguidu nia inan aman nia uma. Bainhira lezada ba kous sira nia oan arguidu foti katana duni tuir kedas lezada no dehan ba lezada katak "*hau kaer toman ó, hau ta'a mate kedas ó hodi fó han tiha ba karau*". Antes agresaun ne'e, arguidu ho lezada diskute malu kona-ba arguidu

lori tiha sira nian oan ba iha arguidu nia inan aman nia uma, ho nune'e mosu agresaun ne'e.

Prokuradór akuza arguidu kontra artigu 145 KP kona-ba ofensa ba integridade física simples ho moldura penal no konjuga artigu 2, 3 (a), 35 (b) no 36 LKVD.

Produsaun ba prova sira

Iha prosesu julgamentu, arguidu konfesa integralmente ba faktu hotu iha akuzasaun, arrepende ona nia hahalok no promete sei la komete tan krime hanesan iha futuro. Arguidu deklara liután katak rezolve ona problema ne'e tuir kultura Timor nian, arguidu fó ona osan ho montante US\$500.00, Bibi ida no karau ida ba lezada nia família.

Alende ne'e, lezada mós konfirma faktu hotu iha akuzasaun no deklara katak depoisde akontesimentu ne'e diak malu ona ho arguidu no rezolve ona tuir kultura Timor nian, arguidu fó ona osan ho montante US\$500.00, Bibi ida no karau ida ba lezada nia família.

Alegasaun finál

Prokuradór konsidera arguidu provadu komete krime hasoru lezada, bazeia ba konfisaun arguidu nian no konfirma mós husi lezada, tanba ne'e husu ba tribunál atu kondena arguidu ho pena prizaun tinan tolu suspende ba tinan tolu.

Enkuantu defeza husu bá tribunál atu kondena arguidu ho pena ne'ebé kamaan ho konsiderasaun katak arguidu konfesa, arrepende nia hahalok, diak malu ona ho lezada no rezolve ona problema ne'e tuir kultura Timor nian.

Desizaun

Depois avalia faktu hotu tribunál konsidera faktu hotu provadu, bazeia ba faktu provadu hirak ne'e no tetu mós ho sirkunstánsia atenuante sira hanesan arguidu konfesa, arrepende nia hahalok no promete sei la komete tan krime hanesan iha futuro no problema ne'e rezolve ona tuir kultura Timor nain. Ho nune'e tribunál konklui prosesu ne'e no kondena arguidu ho pena prizaun tinan tolu suspende ba tinan tolu.

2. Krime arma brankas

Nú. Prosesu : 0505/22 DICMR

Kompozisaun Tribunál : Koletivu

Juís : Dra. Ersilia de Jesus, Dra. Ana Paula fonseca no Dr. José Maria

Prokuradór : Dr. Osorio de Deus

Defeza : Dr. Marçal Mascarinhas

Desizaun : Pena prizaun tinan 3 suspende tinan 3

Iha 8 Novembru 2023, Tribunál Distritál Primeira Instánsia Dili prezide leitura akordaun ba krime armas brankas envolve arguidu Manuel Moniz Vicenti hasoru comunidade Beto barat, iha Munisípiu Dili.

Akuzasaun Prokuradór

Prokuradór akuza katak iha 21 Outubru 2022, iha oras tuku 20:15 kalan, arguidu kaer katana ida lao ba mai iha Estrada Públiku iha Timor Lodge nia oin hodi hakilar halo comunidade ne'ebé lao iha ne'eba sente tauk, tanba comunidade sira hato'o ba polísia hodi kaptura tiha arguidu.

Prokuradór akuza arguidu kontra artigu 2 nú 2 alinea f no artigu 20 nú.1 kona-ba Lei Arma Brankas.

Produsaun ba prova sira

Iha prosesu julgamentu, arguidu deklara katak faktu hotu ne'ebé akuza ba arguidu ne'e loos hotu, arguidu mós deklara katak iha akontesementu ne'e arguidu ho kondisaun lanu no stress ba nia oan ne'ebé nia banin sira lori ba sarani maibé la uza arguidu nia naran. Ho nune'e arguidu mós buka tua hemu no lanu todan hodi foti katana lao ba mai iha estrada públiku. Arguidu mós promete katak sei la halo tan hahalok hanesan ne'e tanba trauma no tauk no foin primeiravés mai hatan iha tribunál.

Tribunál presinde testemuña nia deklarasaun, tanba arguidu konfesa faktu hotu iha akuzasaun.

Alegasaun finál

Prokuradór konsidera arguidu provadu komete duni krime ne'ebé akuza ba arguidu, bazeia ba konfisaun arguidu nian, nune'e atu prevene arguidu repete tan ninia hahalok ne'e iha futuru husu ba tribunál atu kondena arguidu ho pena prizaun tinan ida suspende ba tinan rua.

Defeza

Entretantu defeza husu ba tribunál atu kondena arguidu ho pena ne'ebé kmaan ho konsiderasaun arguidu konfesa, foin primeiravés mai hatan iha tribunál no promete sei la komete tan krime hanesan iha futuru.

Desizaun

Depoisde avalia faktu hotu tribunál konsidera faktu hotu provadu, bazeia ba faktu provadu hirak ne'e no tetu mós ho sirkunstánsia atenuante sira hanesan arguidu

konfesa, foin primeiravés mai hatan iha tribunál no promete sei la komete tan krime hanesan iha futuro. Ho nune'e tribunál konklui prosesu ne'e no kondena arguidu ho pena prizaun tinan tolu suspende ba tinan tolu.

3. Krime ofensa ba integridade física simples no arma brankas

Nú. Prosesu : 0016/22.LILIQ
Kompozisaun Tribunál : Koletivu
Juis : Dra.Ersilia de Jesus, Dr. José Maria de Araújo no Dra.
Ana Paula Fonseca
Prokuradór : Dr. Aderito Tilman
Defeza : Dr. Marcelino Coro
Desizaun : Pena prizaun tinan 3 suspende ba tinan 3

Iha 08 Novembru 2023, Tribunál Judisiál Primeira Instáncia Dili prezide leitura akordaun ba krime arma brankas ne'ebé envolve arguidu HDS hasoru lezada ADS no lezadu DCD, iha Munisípiu Likisá.

Akuzasaun Prokuradór

Prokuradór akuza katak iha 19 Marsu 2022, lezadu DCD ho nia kaben lezada ADS atu ba ba sira nia uma iha Munisípiu Likisá ho objetivu atu ba tuir votasaun, bainhira to'o iha uma lezadu/a deskobre katak ema deskoñesidu balun estraga ona ai-horis iha sira nia uma oin, ho nune'e lezadu husu ba sira nia viziñu, maibé viziñu hatan katak lahatene semak estraga ai horis hirak ne'e, lakleur lzadu nia inan mosu mai diskute malu ho lezadu. Derepentni arguidu mosu husi uma kotuk kaer ho katana atu taa lezadu maibé la konsege tanba lezadu halai ses tiha, arguidu kontinua foti fatuk tula lezadu no kona iha lezadu nia kabaas parte karuk.

Prokuradór akuza arguidu kontra artigu 145 KP kona-ba krime ofensa ba integridade física simples ho moldura penal tinan 1 ka multa no artigu 20 nú.1 kona-ba Lei Arma Brankas.

Produsaun ba prova sira

Iha prosesu julgamentu, arguidu konfesa faktu hotu iha akuzasaun, arrepende ona nia hahalok no foin primeiravés mai hatan iha tribunál.

Tribunál presinde lezadu nia deklarasaun, tanba arguidu konfesa faktu hotu iha akuzasaun.

Alegasaun finál

Prokuradór haktuir katak arguidu konfesa integralmente ba faktu hotu iha akuzasaun no tuir Lei Arma Brankas proibe uza arma sira ne'ebé define hanesan katana, nune'e prokuradór konsidera arguidu provadu komete krime hasoru lezadu, nune'e husu ba tribunál atu kondena arguidu ho pena prizaun suspende ninia ezekusaun.

Entretantu defeza husu ba tribunál atu kondena arguidu ho pena ne'ebé kmaan ho konsiderasaun katak, arguidu konfesa no foin primeiravés mai hatan iha tribunál.

Desizaun

Depois avalia faktu sira hotu, tribunál konsidera faktu hotu provadu. Bazeia ba faktu provadu hirak ne'e no tetu mós ho sirkunstánsia atenuante sira hanesan arguidu konfesa no foin primeiravés mai hatan iha tribunál, ho nune'e tribunál konklui prosesu ne'e no kondena arguidu ho pena prizaun tinan tolu suspende ba tinan tolu.

4. Krime ameasa

Nú. Prosesu	: 0075/23.DINFT
Kompozisaun Tribunál	: Singulár
Juis	: Dr. José Gonçalves
Prokuradór	: Dr. Ricardo Godinho Leite
Defeza	: Dr. Humberto Alves
Desizaun	: Omologa pedidu dezisténsia keixa

Iha 09 Novembru 2023, Tribunál Judisiál Primeira Instánsia Díli Prezide leitura sentesa ba krime ameasa ne'ebé envolve arguidu JAG hasoru lezada MDC, iha Munisípiu Dili.

Akuzasaun Prokuradór

Prokuradór akuza katak 16 Abril 2023, maizumenus iha oras 11:30 dadeer, arguidu ho lezada ko'alia atu hari'i hikas sira nia uma ne'ebé hetan sunu iha fulan hirak liuba iha Aldeia Deposito penal, arguidu dehan ba lezada katak diak maibé antes hari uma, rai ne'e fahe halo rua, sorin fo alin sira halo uma, no sorin ita hari'i uma, rona ida ne'e lezada lá aseita no dehan ba arguidu katak "*ita nia fatin mós klot hela oinsa atu fahe tan ba sira*". Nune'e arguidu ho lezada diskute malu arguidu ameasa lezada dehan "*ó neneik hau sei óho mate ó, tanba hau oho tiha ó ne'e hau bele hola fali fetu seluk*". Ameasa atu oho mate ó ne'e koalia sai ho lian maka'as no seriu halo lezada tauk no pertuba sentimentu no liberdade ba siguransa lezada nian.

Prokuradór akuza arguidu kontra artigu 157 KP kona-ba krime ameasa ho moldura penal tinan 1 ka multa.

Produsaun ba prova sira

Bazeia ba artigu 262 KPP kona-ba tentativa konsiliaun, nune'e antes tama ba julgamentu produsaun ba prova juis husu atu halo tentativa konsiliaun ba arguidu no lezada, iha prosesu tentativa konsiliaun ne'e lezada hakarak dezisté nia keixa hasoru arguidu tanba antes ne'e sira diak malu ona no arguidu promete sei la komete tan krime hanesan iha futuru.

Alegasaun finál

Prokuradór no defeza husu bá tribunál atu omologa pedidu dezisténsia keixa no absolve arguidu husi krime ne'e.

Desizaun

Bazeia ba pedidu dezisténsia keixa ne'e, nune'e tribunál konklui prosesu ne'e no omologa akordu dame ne'e.

5. Krime ofensa ba integridade fízika simples ho natureza violénsia doméstika

Nú. Prosesu : 0060/22.DIDIL
Kompozisaun Tribunál : Koletivu
Juis : Dra. Ana Paula Fonseca, Dra. Ersilia de Jesus no Dr. José Maria de Araújo
Prokuradór : Dr. Luis Hernani Rangel da Cruz
Defeza : Dr. Nelson Borges
Desizaun : Pena prizaun tinan 1 suspende ba tinan 2

Iha 14 Novembru 2023, Tribunál Judisiál Primeira Instáncia Dili prezide leitura akordaun ba krime ofensa ba integridade fízika simples ho natureza violénsia doméstika ne'ebé envolve arguidu BCA hasoru nia feen, iha Munisípiu Dili.

Akuzasaun Prokuradór

Prokuradór akuza katak iha 16 Abril 2022, iha oras ne'ebé la apura, arguidu ho lezada diskute malu kona-ba atu fó han sira nia oan, hafoin diskute malu lezada foti nia roupa atu ba hela iha nia inan aman sira. Bainhira lezada sai husi uma arguidu mós tuir lezada husi kotuk hodi tolok lezada no ko'alia liafuan ne'ebé ladi'ak relasiona ho sira

ninia relasaun intimu hanesan feen ho la'en no lori xave motor nian hodi fai iha lezada nia liman fuan boot rezulta moras no kanek.

Antes ne'e iha loron no fulan ne'ebé la apura, maibé iha tinan 2019, arguidu tebe dala haat iha lezada nia kotuk laran, rezulta moras iha lezada nia kotuk laran.

Prokuradór akuza arguidu kontra artigu 154 KP kona-ba krime maus-tratus ba kónjuje konjuga ho artigu, 2, 3(a), 35 (b) no 36 LKVD.

Produsaun ba prova sira

Iha prosesu julgamentu, arguidu deklara katak iha faktu balun loos no balun laloos, faktu ne'ebé loos mak arguidu lori xave motor nian fai duni lezada nia liman fuan boot. Entretantu faktu kona-ba arguidu tebe dala haat iha lezada nia kotuk laran ne'e laloos, maibé arguidu lori ai baku dala rua iha lezada nia kabaas. Arguidu mós deklara katak depoisde akontesementu ne'e di'ak malu ona ho lezada, arrepende ona nia hahalok no promete sei la komete tan krime hanesan iha futuru.

Iha parte seluk lezada kontinua konfirma faktu hotu iha akuzasaun no konfirma mós ho arguidu nia deklarasaun katak depoisde akontesementu ne'e sira di'ak malu ona.

Alegasaun finál

Prokuradór haktuir katak mezmu arguidu konfesa parsialmente ba faktu iha akuzasaun, maibé lezada konfirma ho akuzasaun nune'e prokuradór konsidera arguidu nia aktu ne'e priense elementu husi krime ne'ebé akuza ba arguidu, ho nune'e husu ba tribunál atu kondena arguidu ho pena prizaun tinan rua suspende ba tinan rua.

Entretantu defeza haktuir katak arguidu deklara deit faktu ne'ebé nia komete no deklara mós katak depoisde akontesementu ne'e di'ak malu ona ho lezada, arrepende nia hahalok no promete sei la komete tan aktu hanesan iha futuru, nune'e husu ba tribunál atu halo alterasaun jurídiku husi artigu 154 KP kona-ba maus- tratus ba kónjuje ba fali artigu 145 KP kona-ba ofensa ba integridade fízika simples no husu ba tribunál atu kondena arguidu ho pena ne'ebé justu.

Desizaun

Depoisde avalia faktu hotu ne'ebé produs durante julgamentu, tribunál aseita ho pedidu alterasaun husi defeza hodi halo alterasaun jurídiku husi krime maus-tratus ba kónjuje ba fali krime ofensa ba integridade fízika simples, tanba konsidera arguidu nia aktu ne'e priense elementu husi krime ofensa ba integridade fízika simples.

Bazeia ba faktu provadu hirak ne'e no tetu mós ho sirkunstánsia atenuante sira hanesan arguidu arrepende nia hahalok, di'ak malu ona ho lezada no promete sei la

komete tan krime hanesan iha futuru. Ho nune'e tribunál konklui prosesu ne'e no kondena arguidu ho pena prizaun tinan ida suspende ba tinan rua.

6. Krime ofensa ba integridade fízika simples ho natureza violénsia doméstika

Nú. Prosesu : 0067/22.LILIK
Kompozisaun Tribunál : Singulár
Juis : Dra. Ana Paula Fonseca
Prokuradór : Dr. Aderito Tilman
Defeza : Dr. Henrique João Morais.
Desizaun : Pena admoestasaun

Iha 17 Novembru 2023, Tribunál Judisiál Primeira Instánsia Dili prezide leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu LJ hasoru nia oan, iha Munisípiu Likisá.

Akuzasaun prokuradór

Prokuradór akuza katak iha 17 Outubru 2022, iha oras tuku 17:00 lokraik, arguidu problema ho lezadu nia inan ne'ebé hanesan mós arguidu nia feen, iha akontesementu ne'e arguidu ho lezadu nia inan hadau malu katana no lezadu nia inan kous hela lezadu, nune'e bainhira sira hadau malu katana, katana rerefe kona iha lezadu nia reen-toos no rezulta lezadu hetan kanekiha lezadu nia reen-toos parte karuk no raan sai barak.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál too tinan 3 ka multa konjuga ho artigu 2, 3(c), 35 (b) no 36 LKVD.

Produsaun ba prova sira

Iha prosesu julgamentu, arguidu konfesa integralmente ba faktu sira iha akuzasaun, arrepende nia hahalok, foin primeiravés mai hatan iha tribunál no promete sei la komete tan krime hanesan iha futuru.

Tribunál prezinde testemuña nia deklarsaun, tanba arguidu konfesa faktu hotu iha akuzasaun.

Alegasaun finál

Prokuradór konsidera arguidu provadu komete krime hasoru lezadu, bazeia ba konfisaun arguidu nian, ho nune'e husu ba tribunál atu kondena arguidu ho pena prizaun suspende nia ezekusaun.

Entretantu defeza husu ba tribunál atu kondena arguidu ho pena admoestasaun ho konsiderasaun, arguidu konfesa, arrepende nia hahalok no promete sei la komete tan krime hanesan iha futuru.

Desizaun

Depoisde avalia faktu hotu, tribunál konsidera faktu hotu provadu. Bazeia ba faktu provadu hirak ne'e no tetu mós ho sirkunstánsia atenuante sira hanesan, arguidu konfesa, arrepende nia hahalok no promete sei la komete tan krime hanesan iha futuru, ho nune'e tribunál konklui prosesu ne'e no kondena arguidu ho pena admoestasaun.

7. Krime ofensa ba integridade física simples ho natureza violéncia doméstika

Nú. Prosesu : 0022/21 ALRMX
Kompozisaun Tribunál : Singulár
Juis : Dra. Ana Paula Fonseca
Prokuradór : Dr. Aderito Tilman
Defeza : Dr. Henrique João Mariz
Desizaun : Pena admoestasaun

Iha 18 Novembru 2023, Tribunál Judisiál Primeira instánsia Dili prezide leitura sentensa ba krime ofensa ba integridade física simples ho natureza violéncia doméstika ne'ebé envolve arguidu JdSM hasoru nia feen, iha Munisípiu Aileu.

Akuzasaun prokuradór

Prokuradór akuza katak iha 17 Setembru 2021, iha oras tuku 09:00 dadeer, arguidu tuku dala ida ho maka'as iha lezada nia ulun, basa dala ida iha lezada nia hasan parte loos. Aktu ne'e rezulta moras iha lezada nia ulun no hasan moras. Kazu ne'e akontese baihira arguidu obriga lezada atu konta sai lezada nia pasadu maibe lezada lakohi nune'e arguidu baku lezada.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál too tinan 3 ka multa konjuga ho artigu 2, 3(a), 35 (b) no 36 LKVD.

Produsaun ba prova sira

Iha julgamentu, arguidu konfesa integralmente ba faktu sira iha akuzasaun no deklarata katak durante moris hamutuk foin primeiravés halo agresan hasoru lezada, arrepende nia hahalok no promete sei larepete tan krime hanesan iha futuru.

Tribunál deside hodi la rona tan lezada nia deklarasaun tanba arguidu konfesa integralmente ba faktu sira iha akuzasaun.

Alegasaun final

Prokuradór haktuir katak iha julgamentu arguidu konfesa integralmente ba faktu sira iha akuzasaun, nune'e prokuradór konsidera arguidu provadu prátika krime ofensa ba integridade física simples ho natureza violénsia doméstika hasoru lezada tanba ne'e husu ba tribunál atu kondena arguidu ho pena prizaun no suspende nia ezekusaun.

Entretantu defeza husu ba tribunál atu kondena arguidu ho pena admoestasaun ho konsiderasaun, arguidu konfesa, arrepende nia hahalok, foin primeiravés komete krime hasoru lezada no promete sei la komete tan krime hanesan hasoru lezada iha futuru.

Desizaun

Depoisde avalia faktu hotu, tribunál konsidera faktu hotu provadu. Bazeia ba faktu provadu hirak ne'e no tetu mós ho sirkunstánsia atenuante sira hanesan arguidu konfesa, arrepende nia hahalok, foin primeiravés komete krime hasoru lezada no promete sei la komete tan krime hanesan iha futuru. Ho nune'e tribunál konklui prosesu ne'e no kondena arguidu ho pena admoestasaun.

8. Krime ofensa korporal resíproka

Nú. Prosesu : 0066/23.ERSIC

Kompozisaun Tribunál : Singulár

Juis : Dr. Afonso Carmona

Prokuradór : Dr. Simeão B. Seixas

Defeza : Dr. Fransisco Caetano

Desizaun : Omologa pedidu dezisténsia keixa

Iha 29 Novembru 2023, Tribunál Judisiál Primeira Instánsia Dili liu husi tribunál movei iha Munisípiu Ermera, prezinde leitura sentensa ba krime ofensa korporál resíproka ne'ebé envolve arguidu Augusto Pereira Martins hasoru Arguida Leopoldina Sousa Trindade, iha Munisípiu Ermera.

Akuzasaun Prokuradór

Prokuradór akuza katak iha 19 Jullu 2023, iha oras tuku 12:00 meiodia, arguida tolok aat lós iha nia kintal laran tanba manu ké estraga arguida nia kantadeiru. Nune'e arguidu nia feen husu ba arguida nune'e "*Tia Dina tolok animál ka tolok ema*". Maibé arguida lahatan no kontinua tolok, tanba ne'e arguidu sai hosi uma laran foti ai-pedasuk ida atu baku arguida maibé lakonsege, depois arguidu soe tiha ai refere no tuku dala rua iha arguida nia reen-toos no inus kauza arguida monu ba rai, arguida hadeer mai kaer arguidu nia kamiza hodi rakut tó kamiza bolsu nakles no liki tó arguidu tiding kidun ba rai.

Prokuradór akuza arguidu ho arguida kontra artigu 151 KP kona-ba ofensa korporal resíproka ho moldura penal too tinan 2 ka multa.

Prosesu tentativa konsiliaun

Bazeia ba artigu 262 alinea 1 KPP kona-ba tentativa ba konsiliaun, nune'e antes tama ba julgamentu produsaun ba prova sira, juis halo tentativa konsiliaun ba arguida no arguidu iha tentativa konsiliaun ne'e sira hakarak dame malu, nune'e arguida husu ba juis atu indemniza nia kanek ho valor osan US\$50.00 no arguidu mós konkorda ho pedidu ne'e hodi fo kedas indemniza ba arguida ho valor osan US\$50.00.

Alegasaun finál

Prokuradór no defeza apresia ho akordu dame ne'ebé parte rua konkorda ona no husu ba tribunál atu omologa pedidu dezisténsia keixa ne'e.

Desizaun

Bazeia ba akordu dame husi parte rua no pedidu dezisténsia keixa husi parte rua, tribunál konklui prosesu ne'e no omologa akordu dame ne'e.

Atu hetan informasaun kompleitu, favór kontaktu:

Ana Paula Marçal

Diretora Ezekutiva JSMP

Diresaun e-mail: ana@jsmp.tl

Telefone: (+670) 33238883 | 77040735

Website: <https://jsmp.tl>

info@jsmp.tl